

[Ilanngussaq](#)

Inatsimmut siunnersuummut nassuiaatit

Nalinginnaasumik nassuiaatit

1. Inatsimmut siunnersuummut tunuliaqutaasoq

Inatsisissatut siunnersuut allannguutissanik arlaqartunik imaqarpoq, ataatsimoortikkaanni akileraartarnermi periutsimik patajaallisaasussanik siunissamilu inuussutissarsiuteqarnikkut ineriartornissamik ilimagisanut naleqqussaasusunik.

Siullermik siunnersuutigineqarpoq aatsitassatigut pisuussutunik misissueqqaarnernut, misissueqqissaarnernut aammalu piaanermut atatillugu killilimmik akileraartussaaneq pillugu malittarisassanik eqqussineqassasoq inatsiseqartitsinikkut tunngavissat paasinarnerulemissaat siunertaralugu. Atuagassiami Skat Udland-imi (SU 2009, 102) ilanngussami Kalaallit Nunaata nunavittap immap ataaniittortaani (immap naqqani) kulbrintisiornernik akileraarusersuisinnaanera inatsisitigut tunngavissaqarnersoq qularutigineqarpoq. Kalaallit Nunaanni kulbrintisiornernut atatillugu isertitat akileraarusersugaanerata pillugu Inatsisartut inatsisaata 1991-imi atorunnaarsinneqarnerani akileraarutit pillugit malittarisassat nunavittap ilaanut immap ataaniittumut aamma atuuttuuneranik aalajangersagaq aningaasarsianit akileraarutit pillugit inatsimmut nuunneqanngilaq, taamaammallu ilanngutassiisup isumaa naapertorlugu nunavittap ilaani immap ataaniittumi ingerlatat arlaqartut akileraarusersornissaannut inatsisitigut tunngavissaqarani. Naalakkersuisut isumaqarput tamatumuunakkut nunavittap ilaani immap ataaniittumi maannamut ingerlanneqartunik kulbrintisiornernik siunissamilu ingerlanneqartussanik akileraartussaaneermut tunngasutigut pissutsit nalornissutigineqalersut, aatsitassatigut pisuussutunik nunami, nunap imartaani aammalu nunavittap ilaani immap ataaniittumi misissueqqarnernut, misissueqqissaarnernut aammalu iluaqutiginninnernut tunngasut ilanngullugit inatsiseqartitsinikkut aaqqiivigineqarnerisigut ajunnginnerpaamik qaangerneqarsinnaasut. Tamannataaq tunngavigalugu siunnersuutigineqarpoq aatsitassatigut pisuussutunik misissueqqaarnernut, misissueqqissaarnernut aammalu piaanermut atatillugu ingerlatsinerit aammalu tamatumunnga atatillugu inuit sulisut akileraartussaataanerata pillugu malittarisassanik eqqussineqassasoq.

Aappassaattut siunnersuutigineqarpoq akeqanngitsumik biileqartitaanerup akileraarusigaanerata annertussusiligaanera qaffaaffigineqassasoq.

Tamatumuunakkut nalinginnaasumik atugaalluartumik sulisunut ajunngitsorsiarititaasumik, biilimik atugassinneqarnermi aningaasatigut iluaqutissinneqarnermut ersersitsinerusumik ullutsinnullu naleqqunnerusumik, akileraarusiinissaq aammalu pisortat akileraarutitigut isertitaannik pisariaqartumik annertusaanissaq eqqarsaatigineqarput.

Pingajussaattut selskabinik nalikillilerissutigisassanik atunngisaqartunik nioqquteqarsinnaanerup pakkersimaarneqarnissaanik siunnersuut siunertaqarpoq. Kalaallit Nunaanni akileraartarnermi nalikillilerinerimut tunngasutigut malittarisassat nunarsuarmi nunanut allanut sanilliullugit ammanerujussuupput orniginartuullutillu. Akileraartarnermi nalikillilerinerimut Kalaallit Nunaanni malittarisassat nunarsuarmi nunanut allanut assersuussinermi aningaasaliinissamut ussassaarinninnermut ilapittuutaapput. Allanguutissat siunnersuutigineqartut tamatuma allanngortinnissaanik siunertaqanngillat, taamaallaalli malittarisassat atuuttuusut iluarinangitsumik sunniutaat illuatungilerniarneqarlutik. Aningaasarsianit akileraarutit pillugit inatsimmi § 30, imm. 4 malillugu isertitatigut akileraaruserinerimut atatillugu amigartoorutit ilaatigut piginnittut annertuumik allannguuteqarsimatillugit ukiumut tullermut ingerlateqqinneqarsinnaanerannut periarfissaq peerneqarpoq, immikkut akuersissummik pissarsiniartoqanngippat. Malittarisassat taakkua siunertaraat selskabinik amigartooruteqartartunik taaneqartartunik niueqateqarnissap illuatungilernissaa – taamatut niuernerit pissappata pisortat isertitaasa annertuumik appariarnerannik kinguneqarsinnaavoq. Aningaasarsianit akileraarutit pillugit inatsit taamatut selskabinik ilanngaataasinnaasunik atorneqanngitsunik pigisaqartunik niuernissamut periarfissamik killiliinngilaq. Selskabinik taamaattunik niuerneq aammattaaq pisortat isertitarisinnaasaannik annertuumik annaasaqarsinnaanissaannik imaqarpoq, aammalu akileraaruserinikkut nalikillilerinerimut tunngasunik malittarisassat atuuttuusut ilaatigut selskabinik amigartoorutaasunik niuernernik pinaveersaartitsinerup avaqquunnissaanut periarfissiillutik. Allanguutissat siunnersuutigineqartut pissutsit taamaattut illuatungilerneqarnissaannik siunertaqarput.

Sisamaattut siunnersuutigineqarpoq nunani allamiut sulisitsisuisa akissarsianik, siulersuisut akissarsiaannik allanillu tunniussinernut atatillugu akileraarutit A-nik unerartitsinissamut nalunaarutiginninnissamullu pisussaaffeqarnerat sakkortusineqassasoq. Tamanna pissalluni inunnit selskabiniillu, Kalaallit Nunaanni eqqartuussiveqarfimmi najugaqanngitsunit akissarsianik, siulersuisut akissarsiaannik allanillu tunniussinernit, assigisaannik tunniussinertuulli A-nik aningaasarsiannngortinneqarnerisigut. Tamatumalu saniatigut unerartitsinissamut pisussaaffeqartut akileraarutit A-nut unerartitat pillugit nalunaarusiamik Kalaallit Nunaanni suliarisassagaat piumasarineqarluni, taamatullu paasissutissat suliamut attuumassuteqartut maani nunami uninngatinneqartassasut, unerartitsisussaaitap nunami angerlarsimaffigisaa Kalaallit Nunaatalu akornanni Kalaallit Nunaannut akileraarutitunerartitsineq pillugu isumaqatigiissuteqanngippat.

2. Inatsisissatut siunnersuutip imarisaa

Aatsitassatigut pisuussutinik suliaqarnermut atatillugu akileraartussaataaneq

Siunnersuutigineqarpoq aatsitassatigut pisuusstinik misissueqqaarnermut, misissueqqissaarnermut aammalu piaanermut atatillugu suliffeqarfinnut tamakkununga attuumassuteqartunut aammalu tamatumunnga atatillugu inuttut sulinermi akileraartussaarnermut inatsiseqartitsinikkut tunngavissat erseqqissaavigineqarnissaat siunertarlugu nutaamik inatsisitigut aalajangersakkanik iluarsivigineqassasut.

Aalajangersakkatigut siunnersuutigineqartutigut suliffeqarfiit arlaqartut inuillu Kalaallit Nunaanni, nunavittap immap ataaniitup aamma nalaani, sulinerinut atatillugu akileraaruserneqarsinnaanerata Kalaallit Nunaanni aningaasarsianit akileraarutit pillugit inatsimmi erseqqissumik tunngavissaqarnissaa qulakkeerneqassaaq.

Nunat tamat akornanni periusiusoq naapertorlugu marloriaammik akileraaruserneqannginnissamik isumaqatigiissuteqarpoq isumaqatigiissusiorneqassalluniluunniit taamatut akileraarusiisinnaanermut pisinnaatitaanerup atorneqarsinnaanerani killiliisuusumik. Tamanna attaveqarpoq marloriaammik akileraaruserneqannginnissamik isumaqatigiissutitigut siunertaasoq tassaamat nunat marluk arlaqartulluunniit isertitanut assigiinngitsunut akileraarusiisinnaaneq nunat isumaqatigiissuteqartut akornanni qanoq agguanneqassanersut. Taamaattumik aalaja-ngersakkat siunnersuutigineqartut suliffeqarfinnut inunnullu nunarpassuarni Kalaallit Nunaata marloriaammik akileraaruserneqannginnissamik isumaqatigiissuteqarfigisimangisaani najugaqartunut tunngatillugu annertunerusumik sunniuteqartussaapput.

Akileraaruseriffiup arlaleriarluni tunngavissaatittarsimavaa aningaasarsianit akileraarutit pillugit inatsimmi aalajangersakkat aamma nunavittap ilaanut immap ataaniittumut atuuttuusut, aningaasarsianit akileraarutit pillugit inatsimmi tamatumunnga tunngatillugu erseqqissumik aalajangersagaqanngikkaluartoq. Naalakkersuisut isumaqarput siusinnerusukkut taaneqartumik atuagassiami ilanngussap kingunerisaanik inatsisitigut tunngavissaqarnermik qularuteqarneq tunngavilersugaarpasittoq, taamaammallu pineqartup tunngaatigut inatsiseqartitsineqartariaqarluni.

Siunnersuutip kingunerissavaa, suliffeqarfiit Kalaallit Nunaanni atortussiassat aatsitassanit pisut pillugit inatsit naapertorlugu akuersissummik nalunaarfigineqarsimasut, aatsitassatigut pisuussutinik misissueqqaarnermut, misissueqqissaarnermut aammalu piaanermut atatillugu isertitaqartut, taamatut ingerlataqarnikkut imaluunniit suliani Kalaallit Nunaanni, aamma nunap imartaani aammalu Kalaallit Nunaanut atasumik nunavittap immap ataaniittup nalaani, ingerlanneqartutigut, isertitanit killilimmik akileraartussaataanerata.

Ukiuni kingulliunerusuni suliffeqarfiit arlaqartut aatsitassatigut pisuussutinik nunavittami immap ataaniittumi misissueqqaarnissamut misissueqqissaarnissamullu akuersissummik pisarsisimapput, suliffeqarfiillu ilaat tamatumunnga atatillugu

annikigisassaanngitsunik aningaasartuuteqartarsimallutik. Naatsorsuutigineqarpoq aningaasartuutit tamakkua siunissami isertitarisinnaajumaakkanit ilanngaatigineqarsinnaanerata, suliffeqarfiit Kalaallit Nunaannut akileraartussaataappata. Suliffeqarfik Kalaallit Nunaanni akileraartussaataaangippat, ani-ngaasartuutit Kalaallit Nunaanni isertitanik naatsorsuinermut attuumassuteqanngitsutut isigisariaqassapput. Suliffeqarfiillu nunagisaminni isertitanik naatsorsuinerminnut atatillugu ani-ngaasartuutit aamma ilanngaatigisinnaanngikkajummatigit suliffiit siunertaanngitsumik annertuumik aningaasartuuteqartinneqarsinnaasarput. Taamatut angusaqarnerup kingunerisinnaavaa Kalaallit Nunaanni aatsitassarsiornerup annikinnerusumik ornigineqalenera, taamatullu aamma angusarisaq akileraartarnermik inatsiseqartitsinermi ingerlatsinermi aningaasartuutit ilanngaateqarsinnaanermik tunngaviusumik periaatsimik uniortitsinerussalluni.

Siunnersuutip nassataraa, danskit, savalimmiormiut imaluunniit nunami allamiut suliffeqarfiutaat Kalaallit Nunaanni aatsitassatigit pisuussutit missueqqaarnermut, misissueqqissaarnermut imaluunniit piaanermut akuersissummik pigisaqartut tamarmik, Kalaallit Nunaanni killilimmik akileraartussaanaissaat. Killilimmik akileraartussaanaerup nassataraa, akuersissummi pineqartunik ingerlatani isertitat taamaallaat akileraartussaanaermut ilanngunneqarnissaat, akerlianillu ilanngaateqarnermut akuerineqarsinnaanerannut tunngaviliisuusinnaallutik.

Killilimmik akileraartussaanaermi taamaallaat pineqarput isertitat Kalaallit Nunaanni aatsitassatigit pisuussutit misissueqqaarnermi, misissueqqissaarnermi aammalu piaanermut imaluunniit tamakkununnga atatillugu sulinermi isertinneqartut. Suliffeqarfik Kalaallit Nunaanni allanik ingerlataqaruni misissueqqaarnermut, misissueqqissaarnermut imaluunniit Kalaallit nunaanni sulinermik ingerlanneqartumut attuumassuteqanngitsunik, sulianut tamakkununnga allanut akileraartussaanaermut aningaasarsianit akileraarutit pillugit inatsimmi §§-it 1 imaluunniit 2-mi aalajangersakkat allat tunngavigineqassapput.

Aalajangersakkami aamma aalajangerneqarpoq, aningaasarsianit akileraarutit pillugit inatsit tamatumunnga atatillugu aamma nunap imartaani aammalu Kalaallit Nunaata nunavittaata immap ataaniittup nalaani atuuttusoq. Nunap imartaa malittarisassat atuuttusut malillugit sinerissamiit (basislinjemiit) 3 sumiliniq atitussuseqarpoq. Nunavittamik immap ataaniittumik oqarneq paasissariaqarpoq tassani pineqarmat immap naqqa aammalu immap iluani nunap ataa, Kalaallit Nunaata imartaata avataaniittoq nunartap pinngortitap pilersitaanik uiguutaata killinganut, sinerissamilli (basislinjemilli) nunap imartaanik naatsorsuinermi aallaaviusumiit 200 sumiliniq annikinnerunngitsumik, nunamulli allamut ungasissutsip affaa qaangernagu.

Suliffeqarfiit matumani pineqartut aalajangersimasumik ingerlatsivittulli malittarisassallu taakkununnga atuuttusut malillugit isertitat naatsorsussavaat. Killilimmik akileraartussaataaernermut ilaatinneqassapput iluanaarutit amigartoorutilluunniit OECD-p isumaqatigiissutinut iluserititaani isummat tunngaviusut, tamatumani pingaartumik isumaqatigiissummi artikel 7, naapertorlugu aalajangersimasumik ingerlatsivimmud tunngatinneqarsinnaasut. Tamatumani ilaatinneqarput aamma iluanaarutit, erniasiat atuisinnaanermullu akiliutit,

ingerlatsineq eqqarsaatigalugu aalajangersimasumik ingerlatsivimmut tunngatinneqarsinnaasut. Taamatuttaaq ingerlatsinermik tunngaveqartunik aningaasartuutit aalajangersimasumik ingerlatsiviup angusarisaani ilanngaatigineqarsinnaapput.

Aammattaaq siunnersuutigineqarpoq suliffeqarfiit aatsitassatigut pisuussutinik ujarlernermit piaanermullu atasumik isertitanik pissarsiaqartut, taamatut ingerlatsinermi imaluunniit Kalaallit Nunaanni, aammalu nunap imartaani aammalu Kalaallit Nunaani nunavittap immap ataaniittup nalaani, suliamik ingerlatsinikkut isertitanik killilimmik akileraartussaatinneqarnissaat, ingerlatat pineqartut qaammatit 12-it ingerlaneranni piffissami piffissaniluunniit katillugit ullut 30-t sinnerlugit sivissuseqartumik ingerlanneqarsimappata.

Aalajangersakkami pineqarput akuersissummik pigisaqartup aatsitassatigut pisuussutinik ujarlernermit piaanermulluunniit atasumik suliffeqarfimmik allamik suliassamik suliaqarnissaanik imaluunniit nioqutissamik aalajangersimasumik pissarsissunneqarnissamik akuersissuteqartumulluunniit sullissinermik isumaqatigiissuteqarsimanera soorlu aamma suliassaq pineqartoq pisarsissusinnarluunniit aatsitassatigut pisuussutinik ujarlernermit piaanermulluunniit atasumik naammassineqaraluarluni, akuersissummik pigisaqartumit pisiarineqanngitsoq. Assersuutigalugu kingulliullugu taaneqartumik pisoqartillugu suliffeqarfik taaneqarsinnaavoq nammineq taaguutini atorlugu ruujorilersuisoq ruujorimilluunniit uuliamik gasimilluunniit assartuinnermit atuisoq.

Aalajangersagaq atorneqassaaq suliassaq pissarsissussinerluunniit akuersissummik pigisaqartuusumik toqqarlugu isumaqatigiissuteqarneq malillugu imaluunniit akuersissummik pigisaqartumut sullissisumik/entreprenørinik taassumaluunniit pilersuisuanik/sullissisuanik imaluunniit tamakkua pilersuisunik/sullissisuinik isumaqatigiissutigeqarsimanera malillugu naammassineqarsimanersoq apeqqutaatinnagu. Taamaasilluni sullissisup/entreprenørinik sorliup naammassinissimanera akileraartussaannermik apeqqummut sunniuteqassanngilaq. Apeqqut tamanna aalajangerneqassaaq, suliassaq pissarsissussinerluunniit aatsitassatigut pisuussutinik ujarlernermit piaanermulluunniit atasumik suliffeqarfimmik allamik suliassamik suliaqarnissaanik imaluunniit nioqutissamik aalajangersimasumik pissarsissunneqarnissamik akuersissuteqartumulluunniit sullissinermik isumaqatigiissuteqarsimanera soorlu aamma suliassaq pineqartoq pisarsissusinnarluunniit aatsitassatigut pisuussutinik ujarlernermit piaanermulluunniit atasumik naammassineqaraluarluni, akuersissummik pigisaqartumit pisiarineqanngitsoq. Assersuutigalugu kingulliullugu taaneqartumik pisoqartillugu suliffeqarfik taaneqarsinnaavoq nammineq taaguutini atorlugu ruujorilersuisoq ruujorimilluunniit uuliamik gasimilluunniit assartuinnermit atuisoq.

Suliffeqarfittut ”ujarlernermit iluaqutiginninnermullu atasoq”-tut isigineqarput ilaatigut atortunik attartortitsineq, assersuutigalugu qilleriviit, ruujorinilersuineq ingerlatsinerlu, aqqusinniornerit umiarsualiviornerlu, illuliornerit, nunamik sajuppillatsitsilluni nunamillu misissuinerit, ineqartitsivinnik ingerlatsineq aamma/imaluunniit kantinermik, nujalerivinnik, napparsimasunik paarsineq allallu atugarissaartitsiniutit. Akerlianik ”ujarlernermit iluaqutiginninnermullu atasoq”-tut isigineqanngillat ilaatigut qallunaat, savalimmiormiut nunanilu allamiut sullissisuusut, tamatumani assersuutigalugu eqqartussissuserisut kukkunersiuisullu, aningaasalersuinnermik allatigullu pilersuisut, imaluunniit nioqutissanik pilersuineq, tamatumani aamma sanaartornermi atortussanik, inuussutissanik il.il. pilersuinerit. Taamatuttaaq qallunaat, savalimmiormiut nunamilu allamiut suliffeqarfiutaasa qillerivimmik, umiarsuarmik il.il.attartortitsineri ”ujarlernermit

iluarutiginninnermullu atasutut” isigineqanngillat, qillerivik, umiarsuaq il.il. inuttaqartinnagu atorneqarpat.

Suliffeqarfiit misissueqqaarnernut attuumassuteqartut aalajangersakkami pineqanngillat. Tamatumuuna eqqarsaatigineqarpoq suliffeqarfiit aatsitassatigut pisuussutinik qinerlernissamut akuersissummik pigisaqartumit suliassinneqarlutik, amerlanertigut sivikitsuinnarmik kalaallit nunaanniillutik suliassinneqartut sanaartormermik imaluunniit assigisaanik suliaqarnerit ataavartumik naleqartunik suliaqanngitsut.

Suliffeqarfiit aalajangersagaq naapertorlugu killilimmik akileraartussanngortut, aalajangersimasumik ingerlatsivinnut malittarisassat atuuttuusut malillugit taakkutullu isertitat naatsorsussavaat. Killilimmik akileraartussaanermi ilaatinneqassapput iluanaarutit amigartoorutilluunniit, aalajangersimasumik ingerlatsivimmut atatinneqarsinnaasut OECD-p isumaqatigiissutinut iluserititaani isummat tunngaviusut, tamatumani pingaartumik isumaqatigiissummi artikel 7, malillugu. Tamatumani aamma pineqarput iluanaarutit, erniasiat atuisinnaanermullu akiliutit, ingerlatsineq eqqarsaatigalugu aalajangersimasumik ingerlatsivimmut tunngatinneqarsinnaasut. Taamatuttaaq ingerlatsinermi pissuteqartumik ernianut aningaasartuutit aalajangersimasumik ingerlatsiviup angusarisaani ilanngaatigineqarsinnaassapput.

Aammattaaq siunnersuutigineqarpoq aalajangersakkamik ilanngussineqassasoq aningaasarsianit akileraarutit pillugit inatsimmi § 2, imm. 1, nr. 1-5, nr. 8 aamma imm. 6-imik nunap imartaanut nunavittallu immap ataaniittup nalaani atuuttussanngortitsisumik. Tamatuma ki-ngunerisaanik ilaatigut sulisut atorfeqarnerminni akissarsiaqartut, killilimmik akileraartussaalerput, nunavittap ilaani immap ataaniittup nalaaniitillutik.

Tamakkua saniatigut siunnersuutigineqarpoq killilimmik akileraartussaataaneq eqqunneqassasoq inunntut, § 1, imm. 1 aamma 2-mi piumasagaatit naammassinninngikkaluarlugit, umiarsuarni, timmisartuni, uuliasiorfinni il.il. Kalaallit Nunaanni, tamatumani aamma nunap imartaani aammalu Kalaallit Nunaanni nunavittap ilaani immap ataaniittup nalaani, aatsitassatigut pisuussutinik misissueqqaarnerni, misissueqqissaanermi aammalu piiaanermi inuttut sulinermut akissarsiaannut sunulluunniit. Tamatumani eqqarsaatigineqarpoq aningaasarsianit akileraarutit pillugit inatsimmi § 2, imm. 1, nr. 17-imi killilimmik akileraartussaaneq pillugu aalajangersagaq atuuttuusooq pisuni tamatigut umiarsuarni, timmisartuni, uuliasiorfinni il.il. sulisut killilimmik akileraartussaanaannik qulakkeerisinnaanngimmat, i-ngerlatat taamaattut nunavittap ilaani immap ataaniittup nalaani pigaluartillugit.

Isertitanik naatsorsuineri isertitat akileraartussaanermut tunngavissiiisut kisimik ilanngunneqassapput, isertitanilu taakkunani aningaasartuutit taamaallaat isertitanut taamaattunut attuumassuteqartut kisimik ilanngaatigineqarsinnaapput. Tassalu imaappooq akissarsiaqartunut nalinginnaasumik ilanngaataasinnaasut kisimik ilanngaatigineqarsinnaasut. Ilanngaatit taamaattut akissarsiat 10 procentii sinnerlugit annertussuseqarsinnaanngillat, ukiumoortumillu ani-ngaasat taakkua

annertunerpaamik Inatsisartut aalajangigaattut amerlassuseqarsinnaallutik. Inuup killilimmik akileraartussaataasup taamaasilluni namminerminut soraarnerussutisiassanut akiliutit imaluunniit aapparisisamasaminut avissimasaminut meeqqanulluunniit inuuniarnermut tapiissutit ilanngaatigisinnaangilai.

Akeqanngitsumik biileqartitaanermik annertunerusumik akileraarusiineq

Akeqanngitsumik biileqartitaanermut akileraartarnermi naligititaasoq 50 procentimik qaffanneqassasoq siunnersuutigineqarpoq. Qaffaaneq malunniutissaaq, atorfeqartitaanermut imaluunniit allatigut sulissussinissamut isumaqatigiissuteqarnermut atatillugu akileraartussaataasumut biili atukkiunneqarpat. Taamatuttaaq qaffaaneq malunniutissaaq inummut siulersuisunut ilaasortatut qinigaasimasumut imaluunniit siulersuisunut, ataatsimiititaliamut, kommissionimut, siunnersuisoqatigiinnut, aalajangiisartutut ataatsimiititaliamut allatulluunniit aqqissuussinernut, tamatumani aamma Naalakkersuisunut, Inatsisartunut aamma kommunalbestyrelsinut, ikiortimut atukkiunneqarsimappat.

Akeqanngitsumik biileqartitaaneq akileraartarnermi nalinga kingullermik Inatsisartut inatsisaatigut nr. 9-ikkut, 29. oktober 1999-imeersukkut aaqqiivigineqarpoq. 2000-imi januarimiit 2009-mi januarimut akit nalinginnaasumik 28 procentip missaanik qaffassimapput, aammalu ilaatigut qamutininut motorilinnut akunnattumik oqimaassusilinnut akileraarut 2004-mi 1.550 koruuninik ukiumut qaffanneqarluni.

Akileraartarnermi procenti 42-miitillugu siunnersuutigineqartoq malillugu akeqanngitsumik biileqartitaanermut naligititaasoq 60.000 koruuniuppat akileraarutininut akiliutissaq ukiumut 25.200 koruuniussaaq. Assersuutigalugu nammineq biilerisamut pisiarinerani 175.000 koruuneqartumut (akunnattumik oqimaassusilik) erniaqartitsineq 9%-iuppat ukiunilu 15-ini nalikillilerinermi ernialersuinermit nalikillilerinerimullu aningaasartuutit ukiumi siullermi 27.500 koruunit missigissavaat. Tamatuma saniatigut orsussamut, akileraarutininut, aserfallatsaaliinermut sillimmasiinermullu aningaasartuutit aamma akilerneqassappat. Akileraartussaataasunut amerlasuunut taamaasilluni suli pilerinarnerussaaq sulisitsisumit biilimik atukkerneqarnissaaq namminerisamik biilitaarnissaminngarnit. Tamatumalu saniatigut nalinginnaasumik akissarsiat aammalu sulisut ajunngitsorsianik, tamatumani aamma akeqanngitsumik biileqartitaanermik akileraarusersuinerup assigiinngissutaat alliartortillugu, appasissumik akileraarusigaasunik sulisunut ajunngitsorsiassatigut akissarsiaqarnissaaq kajuminnarsiatussaaq. Tamannalu suliffeqarfiit atorfissaqartitaminnit amerlanerusunik bilisiortornissaannik kinguneqassaaq, tamannalu aamma avatangiisinut sunniuteqarnermik annertunerulersitsissalluni. Siunnersuut siunertaqarpoq akeqanngitsumik biileqartitaanerup nalinginnaasumik akissarsianik isertitat akileraarusersugaanerannut qaninnerusumik akileraaruserneqarnissaa, taamaasilluni akeqanngitsumik biileqartitsinikkut akissarsiaqartitsineq pilerinarpallaarunnaassammat.

Akileraartarnermi nalikilliliissutinik niuerneq

Siunnersuutigineqarpoq selskabinik nalikillerisinnaanermut periarfissanik atorineqanngitsunik pigisaqartunik niuertarnermut illersuutitut aalajangerneqassasoq selskabip nalikillilerinerimut killiffia immikkut ittumik qaffasissuseqartillugu, selskabip pigisai aningaasarsianit akileraarutit pillugit inatsimmi § 22, imm. 2 malillugu nalikillilerneqarsimasinnaanerimut appartinneqartassasoq, selskabi tamakkiisumik akileraartarnermi nalikillilerisimangippat.

Siunnersuut malillugu appartitsineq pisassaaq, ukiup aningaasarsiorfiusup naanerani ukiup aallartinneranut sanilliussinermi aktiatigut piginneqataassutitigulluunniit aningaasaatit 30 procentii amerlanerusulluunniit aktiaatilinnit piginneqataassuteqartunilluunniit allanit pigineqalersimappata, aammalu aktiaatillit akornanni sunniuteqarsinnaaneq imaluunniit selskabip suliaasigut annertuumik allannguuteqarsimappat. Appaaneq aamma pissaaq selskabi kattuteqatigiinnermi peqataasimappat, agguataarneqarsimappat assigisaanilluunniit pisoqarsimappat.

Aktiat taasisinnaassuseqarnerulluunniit agguanneqarsimanerannut tunngatillugu nalinginnaasumik pineqassaaq ”annertuumik allannguuteqarneq” aktianik taasisinnaassuseqarnermilluunniit agguataarinermik allannguinerim 30 procentii annertunerusulluunniit pineqarpata. Selskabip suliaanut tunngatillugu ”annertuumik allannguuteqarneq” pisimassaaq, selskabip isertitaanit 30 procent annertunerusulluunniit imaluunniit angusarisaasut ilanngaasigaanngitsut ukiumi aningaasarsiorfiusumi pineqartumi siulianut sanilliussinermi sulianit allanit isertitaappata.

Siunnersuummi selskabinik aningaasarsianit akileraarutit pillugit inatsimmi § 22, imm. 2 naapertorlugu nalikillilerisinnaanermut pisinnaatitaaffimminnik atuisimangitsunik akileraartarnermi pissutsinik patsiseqartumik pisisarneq pinngitsoortinniarneqarpoq. Selskabi piffissap ingerlanerani akileraartarnermi nalikillilerisimangikkuni, assersuutigalugu selskabip ingerlatsinermi amigartooruteqarnera imaluunniit anikitsuinnarmik sinneqartooruteqarnera pissutigalugu, pigisat niuernermi nalingisa selskabillu akileraartarnermi nalikillilerinerim 30 procentii killiffiata (pigisat naatsorsuutini nalingi) assigiinngissutaat alliartuinnassaaq. Selskabimi taamaattumi aktiat tunineqarpata, pisisup malittarisassat maannamut atuuttuusut malillugit ajoqutissaqan-ngitsumik pigisat isertitsissutaasut selskabimut ilanngussinnaavai tamakkunungalu atasumik isertitat selskabip nalikilliliissutigisinnaasanik atunngisai sakkugalugit nungutissinnaavai. Tamatumuuna selskabimik tuniniaasut pisisullu selskabinik amigartoorutaasunik niuernermut illersuutit sanioqutaarsinnaassallugit.

Selskabinik nalikilliliissutaasinnaasunik atuisimangitsuuteqartunik niuernerit pisortat isertitanik annertuumik annaasaqarnerannik kinguneqarsinnaapput, niuernerillu inuiaqatigiit eqqarsaatigalugit selskabinik amigartoorutaasunik niuernernut assersuunneqarsinnaallutik. Siunnersuut naapertorlugu selskabit tamakqua tunineqarneranni aningaasarsianit akileraarutit pillugit inatsimmi § 22, imm. 2 naapertorlugu nalikilliliinerit annerpaaffissaattut nalikilliliisimasutut inissinneqassapput.

Peqatigitilluguli pissutsit immikkut ittut tamanna inassutigippassuk immikkut akuersissuteqarsinnaaneq ammaanneqarpoq. Immikkut akuersissuteqarsinnaaneq eqqarsaatigineqarpoq atorineqarsinaasassasoq selskabip uppersarsinnaappagu allamik piginnittoqalerneq, piginnittoqarnerup allanngornera, sunniuteqarsinnaanerup allanngornera imaluunniit sulianik allannguineq, selskabip nalikilliliisinnaanermut pisinnaatitaaffimmik atuisimannginneranik pinnani allamik tunngaveqartoq. Aammalu immikkut akuersissuteqarsinnaaneq, politikikkut inuussutissarsiutini ilusiliinermik allannguinissamik tapersiinissaq kissaatigineqarpat, atorsinnaasutut eqqarsaatigineqarpoq.

Malittarisassat siunnersuutigineqartut selskabinut bursenimi nalunaarsugaasunut atorineqarnissaat siunertaangilaq, suliffeqarfinni taamaattuni piginnittuusut tuniniaanermi pissutsit tun-ngavigalugit ingerlaavartumik allanngorartuummata. Aammattaarlu siunertaangilaq malittarisassat atorineqartarnissaat aningaasarsianit akileraarutit pillugit inatsimmi § 57-imi pineqartuni (selskabimi piginneqataassutininik sulisunut tunniussineq) piginnittuusuni kinguaariit nikinnerini imaluunniit § 58-imi pineqartuni (selskabimik piginneqataassutit ilaqaatasunut tunniunneqarnerini).

Unerartitsinissamut pisussaaffik

Siunnersuutigineqarpoq inunnit selskabinilluunniit atorfeqarnermi inuttut sulinermut, siulersuisunut, ataatsimiititalianut, ataatsimiititaliarsuarnut, siunnersuisoqatigiinnut assigisaannulluunniit ilaasortaanermut imaluunniit ikiortaanermut, akissarsianik tunniussat aningaasarsiat A-ngortinneqassasut, inuit selskabinilluunniit Kalaallit Nunaanni eqqartuussiveqarfimmi angerlarsimaffeqanngikkaluarpataluunniit, akissarsiallu Kalaallit Nunaanni eqqartuussiveqarfimmi pisinnaatitaasoq aqutigalugu akissarsiat tunniunneqanngikkaluarpataluunniit. Peqatigitillugulu siunnersuutigineqarpoq aningaasarsiat A-nut tunngatillugu nassuiaatit Kalaallit Nunaanni suliarineqartassasut, paasissutissallu nassuiaammik suliaqarnermi tunngavigineqartut aammalu atorineqartut allat, aningaasarsiat A-nut akileneqartunik akileraaruseriffiup nakkutilliinermi misissuineranut pingaaruteqarsinnaasut, Kalaallit Nunaanni paarineqartassasut, nunap unerartitsisussap angerlarsimaffigisaata Kalaallit Nunaatalu akornanni Kalaallit Nunaannut akileraarutininik unerartitsinissamik isumaqatigiissuteqartoqarsimangippat.

Siunnersuut nunat tamat akornanni Kalaallit Nunaanni aningaasaliissuteqarnissamut soqutiginninnerup annertusineranut, taamatuttaarlu nunami allamiut suliffeqarfiutaasa akissarsianik siulersuisunut ilaasortat akissarsiaannik allanillu assingusunik kalaallit suliffeqarfiutaannit akiliisarnerisa annertusiartorneranut, atatillugu isigineqassaaq, Nassuiaatip Kalaallit Nunaanni suliarineqarnissaanik piumasaqaat, suliamullu tunuliaqutaasunik atukkat Kalaallit Nunaanni toqqorneqartarnissaannik piumasaqaatit, akileraaruseriffiup nunami allamiut suliffeqarfiutaasa akissarsianik allanillu akiliisarnerinut atatillugu nakkutilliinermik ingerlatsisinnaaneranut periarfissanik pitsannguisitsinissaa naatsorsuutigineqarpoq.

Maannakkut Danmarki kisimi Kalaallit Nunaannut akileraarutininik unerartitsinissaq pillugu isumaqatigiissuteqarfigineqarsimavoq.

3. Pisortanut aningaasaqarnikkut allaffissornikkullu malunniutissat

Naalackersuisut naliliipput akeqanngitsumik biileqartitaanerup akileraartarnermi nalingata qaffanneqarneratigut 8 mio. koruunit missigisaannik isertitaqarnerunissamik nassataqassasoq, 2,1 mio koruunit Nunatta Karsianut aammalu 5,9 mio. koruunit kommunitut kommunitullu ataatsimut akileraarutitigut.

Atortussiassanut tunngatillugu inatsisitigut tunngaviit isumannaajaavigineqarneratigut annertunerusumik isertitaqarsinnaanissamut siunissami pineqartuni qanoq ingerlatsiumaarnissaq apequtaassaaq.

Allannguutissatut siunnersuutit sinneri illersuutit malittarisassatut ilusiligaapput, malittarisassanik maannakkut atuuttuusunik naleqqutinningsumik atuinerup kingunerisaanik isertitassanik annaasaqarsinnaanerup illuatungiliivigineqarnissaanik siunertaqartut. Naatsorsuutigineqanngilaq annertunerusumik isertitaqarnerunissaq, malittarisassanik maannamut atuuttuusunik kissaatiginanngitsumik atuinerup annertussuseqarnera annikitsuaraannaasutut oqaatigisariaqarmat.

4. Inuussutissarsiuteqartunut aningaasaqarnikkut allaffissornikkullu sunniutissat

Akileraartuunissamut malittarisassat nalorninaallinissaat aatsitassalerinnermut atatillugu naatsorsuusiordermut, akileraarutaasussanik aningaasarsiat naatsorsorneqarnerannut aammalu akileraaruseriffimmut nammineerluni nalunaarusiordermut atatillugu aningaasartuuteqarnerunissamik nassataqassaaq. Maannakkut tunngavigisassanik pigisat tunngavigalugit aningaasartuutit taamaattut annertussusissaat eqqoriarneqarsinnaanngillat. Aammattaarlu Kalaallit Nunaannut akileraarutininik akiliuteqarnikkut aningaasartuuteqarnissaq ilimagisariaqarluni. Maannakkut tunngavigisassanik pigisat tunngavigalugit aningaasartuutit taamaattut annertussusissaat eqqoriarneqarsinnaanngillat.

Akeqanngitsumik biileqartitaasarnerup sakkortunerusumik akileraarusersugaalernissaa inuussutissarsiuteqarnermut aningaasaqarnikkut allaffissornikkullu sunniuteqartussaassanngilaq, akileraarusiineq akileraartartumi iluaqutissamik pissarsisuusumi pisussaammat. Akileraarusiinerulli sukannernerulersinneqarnerata suliffeqarfiit sulisumik akissarsiaannik annertunerusumik akileraarusiinnermut taarsiissutitut qaffaanissaannut tatisimanninnerup sakkortunerulersitsisinnaanera pinngitsuuvittussatut oqaatigineqarsinnaanngilaq. Tamatumalu saniatigut aamma biilit akeqanngitsumik atugassiissutigineqartut ikiliallalaarnissaat ilimagisariaqarpoq, tamannalu biileerniarfiit kaaviiartitaqarnerannik annikitsumik appaallatsitsissalluni. Tunngavissanik maanna pigineqartut tunngavigalugit tamatuma qanoq annertutiginissaa eqqoriarneqarsinnaanngilaq.

Nassuiaatit Kalaallit Nunaanni suliarineqartarnissaannik tunngavigisanillu atukkat nunami maani toqqortarineqarnissaannik malittarisassat nunami allamiut sulisitsisuiunut tamatumani pineqartunut ilaasunut aningaasartuuteqarnerulernissaannik kinguneqassaaq. Suliassat taamaattut amerlanertigut kukkunerisuiisoqarfinit inatsisilerituunillu suliarineqakkajunnissaat ilimagineqarpoq. Malittarisassat ilaatigut suliffeqarfinni taamaattuni kaaviiartitaqarnermik annertunerulersitsinissaat ilimagineqarpoq. Tunngavissanik maanna pigineqartut tunngavigalugit tunisaqarnerup annertuseriarnissaata annertussusia eqqoriarneqarsinnaangilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqartussaannigitsutut naatsorsuutigineqarpoq, ilimagineqarlunili akeqanngitsumik biileqartitaanermut naliliussanik qaffaanerit annikinnerusumik biilit akeqanngitsumik atukkiunneqartut amerlassusiinik ikiliallatsitsissasoq. Taamaammat piffissaq ungasinnerusoq eqqarsaatigalugu ilimagineqarpoq siunnersuutip taannartaa killilimmik avatangiisinut pitsaasumik sunniutissasoq.

6. Innuttaasunut allaffissornikkut kingunerisai

Siunnersuut innuttaasunut allaffissornikkut sunniuteqartussaannigitsutut nalilerneqarpoq.

7. Naalagaaffeqatigiinnermut Namminersulernermullu tunngasut

Inatsisissatut siunnersuut naalagaaffeqatigiinnermut attuumassuteqanngilaq.

8. Oqartussaasunit soqutigisaqaqatigiinnillu tusarniaaneq

Siunnersuut makkununga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat, Nunaqavissut Suliffiutillit Kattuffiat (NUSUKA), Sulinermik Inuussutissarsiuuteqartut Kattuffiat (SIK), KNAPK, Deloitte, Grønlands Revisionskontor, Nuna Advokater, Eqqartuussissuserisoqarfik Malling & Hansen Damm, INATSIILERIFFIK INA:NUNA, eqqartuussissuserisoqarfik Henrik Hey aamma Jens Paulsen, Greenland Development, Aningaasaqarnermut Nunanullu Allanut Naalakkersuisoqarfik, Inuussutissarsiornermut Suliffeqarnermullu Naalakkersuisoqarfik, Ilaqutariinnermut Peqqissutsimullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Attaveqarnermut Najugaqarnermullu Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik aamma Aatsitassanut Pisortaqaarfik.

Tusarniaanermi akissuteqaatit makkuninnga tiguneqarput:

KANUKOKA, Kalaallit Nunaanni Sulisitsut Peqatigiiffiat GA, Deloitte, Grønlands Revisionskontor, Nuna Advokater, INATSIILERIFFIK INA:NUNA, Greenland Development, PricewaterhouseCoopers, Isumaginninnermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Klima- og Infrastrukturstyrelsen.

Tusarniaanermi akissuteqaatit tiguneqartut Naalakkersuisullu taakkununga oqaaseqaataat ilanngussami sammineqarput.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Imm. 2-mut

Aalajangersakkami pineqarput suliffeqarfiit (akuersissummik pigisaqartut) Kalaallit Nunaanni atortussiassat aatsitassanik pisut pillugit inatsit naapertorlugu aatsitassatigut pisuussutinik misissueqqaarnermut, misissueqqaarnermut piiannissamullu akuersissummik pisut. Suliffeqarfiit taakkua ulloq akuersissutip pilersinneqarnera aallartiffigalugu killilimmik Kalaallit Nunaannut akileraartussaataalissapput. Aalajangersakkami pineqarput ator-tussiassanik manngertunik kulbrintinillu (uulia gasilu) misissueqqaarnissamut, misissueqqis-saarnissamut qalluinissamullu akuersissutit.

Misissueqqaarnerup nalaani sulianut ilaapput pingaartumik sajuppillatsitsinikkut nunallu sannaanut paasissutissanik katersinerit. Nunavittap ilaani immap ataaniittumi misissueqqaarnerup nalaani ilaatigut ingerlanneqartarput immap naqqanik kiliuineq nunamilu atortussat ikittuinnaat katersorneqartarlutik. Tamakkunanga paasiniaaqqissaarluni misissuinernit paasissutissat, atortussat il.il. ilaatigut misissueqqaarnissamut iluaqutiginninnissamullu atatillugu suliarinnittussarsiornermi tunngavissanut ilaasarput.

Suliffeqarfiit killilimmik akileraartussaataasunut ilaasussat, ilaatigut tassaassapput suliffe-qarfiit nunamik sajuppillatsitsinertigut misissuineramik suliaqartuusut aammalu suliffeqarfiit assingusut, akuersissummik peqarlutik aningaasarsiutigalugu misissueqqaarnermik ingerlat-sisimasut kingornatigullu ilisimasanik

pissarsiarineqartunik tuniniaallutik. Kalaallit Nunaan-nut tunngasunik paasissutissanik tunngaveqartumik iluanaarutit, killilimmik akileraartussaa-nermi pineqartunut ilaanissaat siunnersuutigineqarpoq.

Misissueqqissaarnermi suliat nassaarineqartut aningaasarsiutigalugu iluaqutigineqarsinnaane-rannik paasiniaanerupput aatsitassanik manngertunik kulbrinteqarneranilluunniit nassaarto-qarnissaa apeqqutaatinnagu. Soorunami suliat assigiinngillat, ujarassiorneq uuliasiornerlu nunami suliffeqarfinit peqataaffigineqartarmata, imaani uuliasiornerinnavimmik suliaqartu-niit allaanerusunit.

Ujarassiornermi suliat ilaatigut makkuusarput:

- Nunap sannaanik akoorutissallu atorlugit misissuinerit
- Assammik qillerutit atorlugit misissugassanik pissarsiorneq
- Assammik qillerutit atorlugit qillerinerit
- Akoorutissat atorlugit qaartiterutinik atuinani misissuinerit
- Assammik qillerutaanngitsunik atorluni qillerinerit
- Qaartiterinerit
- Radioaktivimik aallaveqartunik misissuinerimi atortunik atuneq
- Biiliniq assigisaannillu, entreprenurrit atortuiniq il.il. atuneq
- Nunamik manissaanerit soorlu mittarfinnut sulinermilu atugassanik aqqusinniornerit
- Aalaakkaasunik atortulersuineq, iluaqutissanik atortussat, illut il.il.
- Sulluliornerit, putorsualiornerit, usilersorfiliorerit il.il.
- Pisariillisaanermut atatillugu suliat

Imaani uuliasiornermi paasiniaaqqissaarnerit ilaatigut makkuusarput:

- Akuersissuteqarfiusumut tamarmut tunngatillugu sajuppillatsitsinikkut misissui-nerit nutaat
- Misissueqqissaarnermi qillerinerit
- Paasissutissanik katersukkanik tamakkiisumik misissueqqissaarnerit isummersui-nerillu
- Annertunerusumik misissueqqissarnerusinnaasut
- Sumiiffimmi pineqartumi kulbrinteqarsinnaanera pillugu inaarutaasumik nalunaa-rusiorneq

Misissuinerup nalaani akuersissummik pigisaqartuusup akisoorujussuarnik suliassai arlaqar-put, akierlianilli tamatuma nalaani isertitaqarnissaq nalinginnaasumik ilimagineqarsinaasarani.

Iluaqutiginninniarnep nalaani akuersissummik pigisaqartuusut § 1, imm. 1, nr. 3 naapertor-lugu Kalaallit Nunaanut tamakkiisumik akileraartussaagajupput, tassa atortussiassaleriner-mik inatsimmi takuneqarsinnaammat, iluaqutiginninnissamut akuersissutit tunngaviummik aktieselskabinut Kalaallit Nunaanni nalunaarsugaasunut taamaallaat tunniunneqarsinnaasut. Selskabit taakkua aningaasarsianit akileraarutit pillugit inatsimmi malittarisassat nalinginnaa-sut

malillugit isertitaminnik naatsorsuusiussaapput. Kalaallit selskabiutaannik pilersitsinissa-mik piumasaqaateqarfiunngitsuni, inatsisissatut siunnersuutip nassatarissavaa suliffeqarfiit attorneqartut killilimmik akileraartussaannermi pineqartunut ilaanissaat.

Iluaqutiginninnerup nalaani suliasat annertupput.

Ujarassiornermik pilersitsinierup aallarnisarnerini suliasat taagorneqarsinnaapput soorlu inissialiornerit ataatsimullu atugassanik sanaartornerit, ingerlatsinerimi atugassanik tunisas-siornermilu atugassanik illuliornerit, aqqusinniornerit, mittarfiornerit/helikopteritut mittarfiornerit, umiarsualiviornerit, attaveqaatinik pilersitsinerit, imeqarfiornerit, nukissi-orfiornerit il.il.

Tunisassiornerup nalaani suliat makkuussapput soorlu qillerinerit, qaartiterinerit, saffugassa-nik aserorterineq suliarinninnerlu, saffugassanik assartuineq, atortussat nioqqutissallu, illu-nik, maskiinanik atortunillu aserfallatsaaliineq, nerisitsineq eqqiaanerlu, avatangiisinik nakku-tilliineq il.il.

Imaani uuliasiornermi suliasat taaneqarsinnaapput tunisassiorfimmik imaani nalerimanilor-neq, qillerineq/qillerivimmik nalerimaneq, aserfallatsaaliineq, sulisartunut suliasat assigiin-ngitsut, atugarissaarnissamut iliuitsit, ineqartitsineq (imaani nalerimaniliami illusisarfik), pilersuineq, kulbrintinik umiarsuarmik assartuineq, kulbrintinik assartuummik ruujoriliorneq il.il.

Suliffeqarfiit killilimmik akileraartussaataasut ukiut tamaasa akileraaruseriffimmut nammineerluni nalunaarsuummik tunniussisassapput isertitallu, § 2, imm. 1, nr. 10, aamma imm. 6 naapertorlugit, aalajangersimasumik ingerlatsivinnut malittarisassat atuuttuusut malillugit naatsorsorneqassallutik. Tamanna isumaqarpoq killilimmik akileraartussaannermi ilaatinneqassat, OECD-p isumaqatigiisummut iluserititaani isummat tunngaviusut, tamatumani pingaartumik artikel 7, malillugit killilimmik akileraartussaataasumut atatinneqarsinnaa-sunik iluanaarutit amigartoorutilluunniit. Tamatumani aamma iluanaarutit, erniasiat atuisin-naatitaanermullu akiliutit, ingerlatsineq eqqarsaatigalugu aalajangersimasumik ingerlatsivim-mut toqqaannartumik atatinneqarsinnaasut. Taamatuttaaq ingerlatsinermit pissuteqartumik ernianut aningaasartuutit aalajangersimasumik ingerlatsiviup angusarisaani ilanngaatineqar-sinnaassapput.

Imm. 3-mut

Soorlu imm. 2-mut nassuiaatini takuneqarsinnaasoq, pingaartumik misissueqissaarnerup iluaqutiginninnerullu nalaani sulianik assigiinngitsunik ingerlatsineqartassaaq. Amerlasuuti-gullu akuersisummik pigisaqartup sullissisut allat, entreprenurit il.il. suliasat taakkua ilaasa suliarinissaat siunertaralugu atortassavai imaluunniit suliasat annertunerusut il.il. naammassi-nissaat anguniarlugu.

Taamatut pisoqarneranni ilaatigut sullissisut, entreprenurit il.il. Kalaallit Nunaata avataani angerlarsimaffeqartassapput. Aalajangersakkap kingunerissavaa suliffeqarfiit tamakkua killi-limmik akileraartussaannermi ilaanissaat, suliffeqarfinni taamaattuni aatsitassatigut pisuussu-tinik misissueqqissaarnermut piiarnermut atatillugu isertitaqarnerminni imaluunniit Kalaallit Nunaanni, tamatumani aamma nunap imartaani aammalu nunavittap ilaata immap ataaniittup nalaani sulinermi akissarsianik.

Suliffeqarfittut ”ujarlernermit iluaqutiginninnermullu atasoq”-tut isigineqarsinnaapput ilaati-gut atortunik attartortitsineq, assersuutigalugu qillerivinnik, ruujorilersuineq ingerlatsinerlu, aqqusinernik umiarsualivinnillu pilersitsinerit, illuliornerit, nunamik sajuppillatsitsilluni nuna-millu misissuinerit, ineqartitsivinnik ingerlatsineq aamma/imaluunniit kantiinamik, nujaleri-sitsisoqarfiit (piffimmi tassani), napparsimasunik paarsineq allallu atugarissaartitsiniutit.

Killilimmik akileraartussaannermi pineqartunut ilaanngitsut – suliffeqarfiit Kalaallit Nunaannut akileraartussaariinngippata – tassaassapput eqqartuussissuserisutut kukkunersiuisutullu siunnersuinerit, aningaasalersuinermit pilersuineq, nioqutissanik, sanaartornermi atortus-sanik, inuussutissanik il.il., tamakkuninnga suliaqarneq misissueqqissaarnermut iluaquti-ginninnermullu atasutut naammattumik isigineqarsinnaanngimmata.

Killilimmik akileraartussaataitasunut aamma ilaanngillat Qallunaat, savalimmiormit, nuna-nilu allamiullaunniit suliffeqarfiutaat assersuutigalugu qillerivinnik, umiarsuarnik assigisaan-nilluunniit bareboat-imi piumasaqaatit malillugit attartortitsineq (leasing). Qilleriviup, umiar-suup il.il. inuttaqartinnagu tiguneqarneranut aalajangiisuvoq, qillerivimmut, umiarsuarmut il.il. atatillugu inunnik attartortitsisumi atorfeqartitaasunik malinnaatitsineqannginnissaa.

Aammalu suliffeqarfiit misissueqqaarnermut atasut sulianik pilersuinermilluunniit ingerlatsisut aalajangersakkami pineqartut avataaniissapput. Misissueqqaarnermut tunngatillugu akuersis-summik pigisaqartoq kisimi killilimmik akileraartussaassaaq, imm. 2 naapertorlugu. Tamatu-munnga tunuliaqutaasoq tassaavoq, misissueqqaarnermi suliat pingaartumik nunamik sajup-pillatsitsilluni nunallu sannaanik misissuinerit tunngasutigut ilisimasanik katersinernik tun-ngveqarnerat, piffissallu sulianik ingerlatsiviusut sivikitsuinnaasarlutik, taamatullu ataavar-tussanik sanaartornermi il.il. ingerlatsineqassanani.

Suliffeqarfiit killilimmik akileraartussaataitasut ukiut tamaasa nammineerluni nalunaarsuum-mik akileraaruseriffimmut tunniussisassapput isertitallu, § 2, imm. 1, nr. 10, aamma imm. 6 naapertorlugit, aalajangersimasumik ingerlatsivinnut atuuttuusunik malittarisassat malillugit naatsorsorneqassallutik. Tamanna ima isumaqarpoq killilimmik akileraarutaasussanut ilaassa-sut iluanaarutit amigartoorutilluunniit, OECD-p isumaqatigiissutinut iluserititaani isummat, tamatumani pingaartumik isumaqatigiissutip artikel 7-iani, tunngaviusut malillugit suliffeqar-fimmut killilimmik akileraartussaataitasumut atatinneqarsinnaasut, tamatumani aamma ilaap-put iluanaarutit, erniasiat atuisinnaatitaanermullu akiliutit, ingerlatsineq eqqarsaatigalugu aalajangersimasumik ingerlatsivimmut

toqqaannartumik atatinneqarsinnaasut. Taamatuttaaq ingerlatsinermik tunngaveqartunik aningaasartuutit aalajangersimasumik ingerlatsiviup angu-sarisaani ilanngaatigineqarsinnaassapput.

Imm. 4-mut

Siunnersuutigineqarpoq imm. 3-mi suliani atortussanik pilersuisuusunut, entreprenurinit assigisaannullu akileraartussaannermut tunngasumik malittarisassat atorneqassanngitsut, iser-titat sulinikkut, siunnersuinikkut assigisaannilluunniit ingerlatsinerit piffissami piffissani-luunniit arlaqartuni qaammatit 12-it ingerlaneranni ullut 30-t sinnerlugit sivisunerusumik ingerlanneqarsimangippata.

Siunnersuutikut suliani atortussanik pilersuisut allallu, Kalaallit Nunaanni piffissani sivikitsu-innarni sulisartut akileraartussaataitanermut ilaassanngitsut qulakkeerneqarpoq, taamaasilluni ilaatigut aningaasarsianik akileraaruteqaataasussanik naatsorsuusiormik, nammineerluni nalunaarsuummik il.il. suliaqartussaajunnaarlugit. Pisut ilaanni akileraartussaannermut atasu-nik pisussaaffiit pilersuinerup naleqassusianut iluseqarneranulluunniit naleqqutinngissinnaa-sarmata.

Ullut 30-it naatsorsorneranni ulloq tikiffiusoq aallarfiusorlu ilanngullugit ullutut naatsorsuu-tigineqassapput. Tamatumani apeqqutaanani ullunik 30-nik qaangiisimasinnaannermut suna pequtaasimasinnaanersoq.

Ullunik 30-nik taamatut malittarisassaqaarnerup saneqqutaarniarneqarsinnaanera illuatungiler-niarlugu siunnersuutigineqarpoq atortussanik pilersuineq suliffeqarfimmit suliffeqarfimmut allamut attaveqartumit ingerlanneqarpat, pilersuineq suliffeqarfimmit attavigineqartumit ingerlanneqartutut isigineqassaaq, tamatumani pilersuutigineqartut suliffeqarfimmiillu attavi-gineqartumiit pilersuutigineqartut annertunerusutigut assigiippata.

Suliffeqarfik toqqaannartumik toqqaannanngitsumilluunniit aqutsinermi, nakkutilliinermi aningaasaqarnikkulluunniit ingerlatami allami peqataasoq, imaluunniit inuit taakkuusut toq-qaannartumik toqqaannanngitsumilluunniit aqutsinermi, nakkutilliinermi aningaasaqarnikkul-luunniit suliffeqarfinni pineqartuni marluusuni tamani peqataappata, suliffeqarfittut attaveqar-tutut isigineqassaaq.

Malittarisassaq assersuutigalugu naleqqussinnaassaaq, suliffeqarfik § 2, imm. 3-mi aalaja-ngersakkat malillugit akileraartussaataitaasoq, tamatumunngalu atatillugu nunami allamiut suliffeqarfiutaanni suliffeqarfissuup aallaavigisap immikkoortortaasa ilaannik suliffeqarfiup akileraartussaataitaasup suliakkiisup suliassaasa ilaannik suliannik ingerlatsinissaanik isumaqa-tigiissuteqarnerani tamatumani suliaq ullunit 30-nit sivikinneruppat. Taamatut pisoqartil-lugu isertitat aningaasartuutillu suliap ilaannik suliaqarnermut atasuusut, suliffeqarfiup iserti-taanik naatsorsuinermi ilanngunneqartussaassapput. Aalajangersagaq ilaatigut aamma kalaal-lit suliffeqarfiutaat suliakkiisusooq imm. 2 naapertorlugu akileraartussaataillugu atorneqartas-saaq.

Piomasagaataavoq nunami allamiut suliffeqarfiutaata annertunerpaamik nioqqutissamik sullis-sinermilluunniit, suliffeqarfiup akileraartussaataitasup suliakkiisup nioqqutissanik sullisiner-nilluunniit, tamatumani aamma suliassamik tamakkiisumik suliarinninnissamut isumaqatigiis-suteqarnermut atatillugu, ingerlatarisaanik, pilersuisuunissaa. Assersuutigalugu suliffeqarfiup akileraartussaataitasup suliakkiisuusup allaffimmik sanasussaalluni tamatumunnga atatillugu suliffeqarfissuup ataatsip iluani nunami allamiut suliffeqarfiutaanut immikkoortortatut sulif-feqarfimmut qaartiterinermik suliassap suliarinissaanut isumaqatigiissuteqarfigippagu, suliat annertuumik assigiissutut isigineqassapput. Akerlianilli nunami allamiut suliffeqarfiutaat allaffimmi atortussanik IT-mik atortutik pilersuillunilu ikkussuissappat, taamatut ingerlatsi-neq, suliffeqarfimmit akileraartussaataitasumit suliakkiisuusumit sulianik ingerlataanut anner-tunerusumik assingusutut isigineqassanngilaq.

Imm. 5-mut

Aalajangersakkap aalajangerpaa, aningaasarsianit akileraarutit pillugit inatsimmi § 2, imm. 1, nr- 1-5, nr. 8, aamma imm. 6, nunap imartaani nunavittallu immap ataaniittup nalaani aamma atuutissasut. Tamatumuuna ilaatigut inuit atorfeqarnermi akissarsiaqartut killilimmik akileraartussaataitaassapput, nunap imartaaniikkunik nunavittallu ilaata immap ataaniittup nalaaniikkunik. Aalajangersagaq ilaatigut sulisunut suliffeqarfimmi imm. 2 aamma 3-mi pineqartumi atorfeqartunut atuutissaaq.

Tamakkua saniatigut siunnersuutigineqarpoq killilimmik akileraartussaataitaaneq atuutissasoq inunnut § 1, imm. 1 aamma 2-mi piomasagaatit naammassinninngikkaluarlutik umiarsuarni, timmisartuni, uuliasiorfinni il.il., nunap imartaani aammalu Kalaallit Nunaanni nunavittap ilaani immap ataaniittup nalaani, Kalaallit Nunaanni aatsitassatigut pisuussutinik misissueq-qaarnermut, misissueqquissarnermut aammalu piaanermut atatillugu qanorluunniit akissarsiaqartunut.

Assersuutigalugu umiarsuarni timmisartunilu inuttaasut il.il. nunamik sajuppillatsitsinernut atatillugu sulianik ingerlatsisut ilaatinneqassapput, Kalaallit Nunaannilu nammineerluni nalu-naarsuummik tunniussisussaassallutik. Sulisut pilersuisumi, akuersissuteqartumut sullissisumi il.il., suliffeqartut taamatuttaaq aalajangersakkami pineqartunut ilaassapput.

Isertitat naatsorsorneranni sulisut isertitaat, tassalu sulinikkut isertitat, killilimmik akileraar-tusnaanermut tunngaviusut, taamaallaat ilanngutissavaat, aningaasartuutillu isertitanut tamak-kununnga tunngasut kisimik ilaanngaatigineqarsinnaallutik. Ilanngaatit annertussutsikkut akissarsianit 10 procenti sinnissanngilaat, amerlassutsillu ukiumoortumik annerpaamik Inatsi-sartut annertussusiliinerattut taamaallaat annertussuseqarsinnaallutik. Inatsisartunit ukiumut annertussusiliineq qaammatisiutini ukiup pineqartup siuliani ukiup affaata siulliup ingerlane-rani Inatsisartut ataatsimiinneranni aalajangerneqartassaaq. 2009-mi ukiumut aningaasarsior-fiusumut annertussutsit 1.000 koruuninut aalajangigaapput. Inuup

killilimmik akileraartussaa-titaasup taamaasilluni namminerminut soraarnerussutisiassanut aqqissuussinernut akiliutini imaluunniit aapparimasaminut meeqqanulluunniit inuuniarnermut tapiissuteqarnermi akiliu-tit ilanngaatisinnaassanngilai.

Nr. 2-miit 4-mut

Siunnersuutigineqarpoq akeqanngitsumik biileqartitaanerup nalilerneqarnera 50 procentimik qaffanneqassasoq. Qaffaanissanik siunnersuutip saniatigut malittarisassat allanngortinnagit ingerlatiinnarneqassapput.

Siunnersuutip kinguneraa, akeqanngitsumik biileqartitaanerup nalinga ukiumut 60.000 koruuninut aalajangerneqarnera, taamaattorli naligititaq 30.000 koruuninut appartinneqassalluni illoqarfimmi pineqartumi aqquserngit, biilip atorneqarfiisa annertussuseqarnera 24.000 kvadratmeterit aammalu 75.000 kvadratmeterit akornanniippat. Aqquserngit, biilip atorneqarfiisa annertussuseqarnerata illoqarfimmi pineqartumi 25.000 kvadratmeterit ataassi-mappagu, niligititaq 15.000 koruuninut appartinneqassaaq. Aqquserngit annertussusiinut aqqusinernut illunullu nalunaarsuiffimmi kisitsisaatit tunngavigineqarput.

Illoqarfiit makkua aqquserngi maannakkut 75.000 kvadratmeterinik annertunerusumilluunniit annertussuseqarput: Qaqortoq, Narsaq, Nuuk, Sisimiut, Aasiaat aamma Ilulissat.

Illoqarfiit makkua aqquserngi maannakkut 25.000 aamma 75.000 kvadratmeterit akornanni annertussuseqarput: Nanortalik, Ivittuut, Paamiut, Maniitsoq, Qasigiannuit, Qeqertarsuaq, Uummannaq, Upernavik aamma Tasiilaq.

Illoqarfiit makkua aqquserngi maannakkut 25.000 kvadratmeter ataallugit annertussuseqarput: Kangaatsiaq, Avanersuaq aamma Illoqqortoormiut.

Taamatut naliliinerup akeqanngitsumik biileqarnerup akileraarusersornera akeqanngitsumik biilini atugassaqartitaanerup naleqassusianut naleqqiullugu piviusorsiornerulersippaa. Akileraarusiinernut aalajangiisuussaaq sulisitsisup imaluunniit allatut inuussutissarsiuteqartitsisup biili akileraartussaataasumut nammineq atugassaatur atukkiussinera, pineqartup tamakkiisumik akilinngisaanik. Sulisorisat saniatigut aamma inuit siulersuisunut ilaasortatut qinigaasimasut imaluunniit siulersuisunut, ataatsimiititaliamut, kommissionimut, siunnersuisoqatigiinnut, aalajangiisartutut ataatsimiititaliamut allatulluunniit aqqissuussinernut, ikiortit tamatumani aamma Inatsisartunut aamma kommunalbestyrelsinut kiisalu Naalakkersuisuni ilaasortat biilimik atugassinneqartut, aalajangersakkami pineqartunut ilaapput.

Nr. 5-imut

Siunnersuutigineqarpoq selskabinik nalikilliliinermut periarfissanik atuisimanngitsunik niuer-nermut illersuutitut aalajangerneqassasoq, suliffeqarfiup nalikillilerinermi killiffia, immikkut annertusaavigineqarsimatillugu, selskabip akileraartarnermi nalikilliliisinnaanerit tamakkiisu-mik atorsimanngippagit, selskabip pigisai aningaasarsianit akileraarutit pillugit inatsimmi § 22, imm. 2 malillugu nalikillilersimanissaraluannut appartinneqassasoq.

Assersuut:

Selskabi illumut tunngatillugu ukiuni arfinilinni katillugit 30 procent angullugu akileraartar-nermi nalikillilerisinnaalluni piffissami tamatumani 20 procentiinnaat nalikillilerutigisimappa-git, siunnersuummi piumasaqaataasut ukiumi aningaasarsiorfiusumi naammassineqarfigisaan-ni akileraartarnermi illumut tunngatillugu nalikilliliissutigineqarsinnaasoq 10 procentimik appartinneqassaaq. Taamatut pisoqartillugu selskabi qinnuteqarsinnaavoq siusinnerusukkut ukiumut akileraaruserneqarsimanerup suliareqqinneqarnissaanik, aningaasarsianit akileraarutit pillugit inatsimmi § 47 naapertorlugu, annertunerusumik nalikilliliinissaq siunertaralugu. Ta-matumunnga atatillugu ukiumi arlaqartuniluunniit uterfigineqartuni akileraartarnermi amigar-toorneqarpat, amigartoorutit aningaasarsianit akileraarutit pillugit inatsimmi § 30-mi malittarisassat, aamma aalajangersakkani taakkunani imm. 4, taamatut amigaartoorutinik immikkut ittumik naatsorsuinerni pisoqartillugu nuussisinnaanermik atorunnaarsitsisinnaasuusoq, malil-lugit ukiumut tulliunut nalikilliliisinnaanerit ukiumut kingusinnerusumut nunneqarsinnaapput.

Appaaneq siunnersuut malillugu pisinnaavoq, aktiatigut piginneqatassutigulluunniit ani-ngaasaatit 30 procentii amerlanerusulluunniit ukiup aningaasarsiorfiusup naanerani ukiup ani-ngaasarsiorfiusup pineqartup aallartinneranut sanilliussinermi aktiaateqartunit imaluunniit peqataasunit allanit pigineqalersimappata, aammalu aktiaateqartut akornanni sunniuteqarsin-naanermut tunngasut imaluunniit selskabip suliai annertuumik allannguuteqarsimappata. Ap-paaneq aamma pisinnaassaaq selskabi kattuteqatigiinnermut peqataasimappat, agguataarne-qarsimappat assigisaanilluunniit allannguuteqartoqarsimappat.

Aktiat taasisinnaassuseqarnerulluunniit agguanneqarsimanerannut tunngatillugu nalinginnaa-sumik pineqassaaq ”annertuumik allannguuteqarneq” aktianik taasisinnaassuseqarnermilluun-niit agguataarinermik allannguinermi 30 procentii annertunerusulluunniit pineqarpata. Sel-skabip suliaanun tunngatillugu amerlanertigut ”annertuumik allannguuteqarneq” pisimassaaq, selskabip isertitaanit 30 procenti annertunerusulluunniit imaluunniit angusarisaasut ilanngaa-sigaanngitsut ukiumi aningaasarsiorfiusumi pineqartumi siulianut sanilliussinermi sulianit allanit isertitaappata.

Tamatumunnga peqatigitillugu siunnersuutigineqarpoq aalajangersakkanit allaanerusumik im-mikkut akuersissuteqartoqarsinnaassasoq pissutsit immikkut ittut tamanna inassutiginar-tip-passuk. Immikkut akuersissuteqarsinnaaneq eqqarsaatigineqarpoq ator-neqarsinnaassasoq sel-skabip up-pernarsarsinnaappagu allamik piginnittoqal-erneq, piginnittoqarnerup allanngornera,

sunniuteqarsinnaanerup allanngornera imaluunniit sulianik allanngineq, selskabip nalikillilii-sinnaanermut pisinnaatitaaffimmik atuisimanninneranik pinnani allamik tunngaveqartoq. Immikkut akuersissuteqarsinnaaneq pillugu aalajangersagaq ilaatigut Kalaallit Nunaanni ator-tussiassat aatsitassanit pisut pillugit inatsit naapertorlugu akuersissutinik toqqaannartumik toqqaannartuunngitsumilluunniit nuussinermut atatillugu atorneqarsinnaavoq. Aammalu im-mikkut akuersissuteqarsinnaaneq, politikikkut inuussutissarsiutini ilusiliinermik allanngui-nissamik tapersiinissaq kissaatigineqarpat atorneqarsinnaasutut eqqarsaatigineqarpoq.

Malittarisassat siunnersuutigineqartut selskabinut bursenimi nalunaarsugaasunut atorneqarnis-saat siunertaanngilaq, suliffeqarfanni taamaattuni piginnittuusut tuniniaanermi pissutsit tun-ngavigalugit ingerlaavartumik allanngorartuummata. Aammattaarlu siunertaanngilaq malitta-risassat atorneqartarnissaat piginnittuusuni kinguaariit nikinnerini aningaasarsianit akileraaru-tit pillugit inatsimmi § 57-imi pineqartuni (selskabimi piginneqataassutsinik sulisunut tunni-ussineq) imaluunniit § 58-imi pineqartumi (selskabimik piginneqataassutit ilaqutaasunut tun-niunneqarnerini).

Siunnersuummut tunuliaqutaasoq pillugu inatsisissatut siunnersuummut nalinginnaasumik nassuiaatit innersuussutigineqarput.

Nr. 6-imumt

Aalajangersakkap kinguneraa, isertitat aningaasarsiat A-tut isigineqannginnerat, isertitat to-qukkut qimaguttup pigisanik qimataanit, peqatigiiffinnit tamat iluaqutissaattut tamanulluun-niit ajunngitsuliuutaasutut ingerlatsivinnit, Kalaallit Nunaanni eqqartuussiveqarfimmi nalu-naarsugaanngitsunit, akiligaappata. Peqatigiiffik assigisaalluunniit Kalaallit Nunaanni eqqar-tuussiveqarfimmi nalugaarsugaanani, Kalaallit Nunaanni pisinnaatitaasumik sinniiseqarpat, § 75, imm. 4 malillugu, pisinnaatitaasutut sinniisaasoq akissarsiarititanit akileraarutit A-nik unerartitsissaaq.

Nr. 7-imumt

Siunnersuutigineqarpoq akileraarutit A-t pillugit nassuiaasioq Kalaallit Nunaanni ingerlan-neqassasoq, paasissutissallu nassuiaammut tunngavigineqartut aammalu suut akileraaruseriffi-up aningaasarsiat A-nik akissarsititsinernut nakkutilliineranut pingaaruteqarsinnaasut, Kalaal-lit Nunaanni toqqortarineqassasut. Piumasaqaatilli taakkua saneqqunneqarsinnaapput, nunap unerartitsinissamut pisussaaffeqartup nunagisaa Kalaallit Nunaatalu akornanni Kalaallit Nu-naannut akileraarutinik unerartitsinissamik isumaqatigiissuteqartoqarsimappat.

Kalaallit Nunaanni nassuiaasiornissamik piumasaqaatip piumasaqaatiginngilaa, akileraarutit A-nik nalunaaruteqarneq (ingerlateqqiillunilu akiliineq) pinngitsoorani Kalaallit Nunaanni pissasut. Nassuiaatit taamaasilluni allakkatigut

nassiunneqarsinnaapput elektronikkimilluun-niit atortorissaarutit atorlugit suliffeqarfiup nunaaniit assigisaanilluunniit nalunaarutigineqar-sinnaapput. Nassuiaatilli maani nunami suliarineqarsimasuussapput, taamatullu suliffeqarfiup nassuiaatit assilinerinik pigisaat maani toqqorsimaneqassallutik.

Nassuiaatit, tamatumunngalu paasissutissat tunngavigineqartut (akissarsiat allagartaat il.il.) naatsorsuutinik toqqorsimanninnissamik nalinginnaasumik malittarisassat atuuttuusut malillu-git ukiuni tallimani toqqorsimaneqassapput.

§ 2-mut

Imm. 1-imut

Siunnersuutigineqarpoq inatsit 1. januar 2010-mi atuutilissasoq, takuulli imm. 2.

Imm. 2-mut

Siunnersuutigineqarpoq inatsisissatut siunnersuummi nr. 5 ulloq 25. september 2009 atuuti-lissasoq.

Siuartitamik atuutilertitsinikkut kissaatiginanngitsunik isertitassanik annaasaqarsinnaanissaq pinngitsoortinniarneqarpoq. Tamatumani eqqarsaatigineqarluni, inatsimmut siunnersuutip saqqummiunneqarneranut atatillugu tamanut tusarliunneqarneraniit inatsimmilu aalajanger-sakkat sinnerisa atuutilernissaasa tungaanut, akileraartarnermi pissutsinik tunngaveqartunik selskabinik nalikillerisinnaanermik atuisimanngitsunik nioqquteqartoqarsinnaanera ilimanar-sinnaammat. Taamatut nioqquteqarnerup kingunerissavaa isertitassanik annaasaqarneq, ta-mannalu atuutilernissamik siuartitsinermi pinngitsoortinniarneqarluni.

Imm. 3-mut

Siunnersuutigineqarpoq suliffeqarfiit aningaasarsianit akileraarutit pillugit inatsimmi § 2, imm. 2-mi nutaami pineqartunut ilaasut, takuuk inatsisissatut siunnersuummi § 1, nr. 1, inatsi-sip atuutilinnginnerani misissueqqaarnermut, misissueqqissaarnermut aammalu Kalaallit Nu-naanni, tamatumani aamma Kalaallit Nunaata imartaani aammalu Kalaallit Nunaata nunavit-taata ilaata immap ataaniittup nalaani, aatsitassatigut pisuussutinik piiaanermut atatillugu ani-ngaasartuuteqarsimasut, aalajangersimasumik ingerlatsivinnut malittarisassat atuuttuusut ma-lillugit, takuuk § 2, imm. 1, nr. 10, aammalu § 2, imm. 6-imi malittarisassat, aningaasarsiat akileraaruteqaataasussat naatsorsorsinnaagaat. Ukiumi aningaasarsiorfimmi 2009-mi ukiunilu isertitaqarfiusuni siusinnerusuni isertitat ataatsimoortillugit naatsorsorneqarsinnaapput. Tama-tumuuna amigartoorutit naatsorsorneqartut aningaasarsianit akileraarutit pillugit inatsimmi § 30-mi malittarisassat malillugit

nuunneqarsinnaapput aningaasarsianillu akileraaruteqaataa-sussanit ilanngaatigineqarsinnaallutik. Aammalu aningaasarsianit akileraarutit pillugit Inatsisartut inatsisaanni aamma akileraaruserinermik ingerlatsineq pillugu Inatsisartut inatsisaanni aalajangersakkat taamatulli atuupput.

Aalajangersagaq ikaarsaariarnermi malittarisassaavoq suliffeqarfiillu, inatsisip atuutilinngin-nerani misissueqqaarnissamut, misissueqqissaarnissamut imalunniit nunavittap ilaani immap ataaniittup nalaani aatsitassatigut pisuussutunik piiaanissamut akuersisummik pisimasut, ami-gartoorutaasinnaasunik inatsisip atuutilinnginnerani pilersunik ukiumi kingusinnerusumi ani-ngaasarsianik akileraaruteqaataasussanik isertitat iluanaarutitaannit ilanngaateqarsinnaaner-mik annaasaqannginnissaasa qulakkeernissaanik siunertaqarpoq.